



# Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :



Tir Yimiyim



tiryimiyim@aolima



tir yimiyim

TAPAK 7

**UFC bout nung Puja-i otsü tasen ka yanglu**

**Israel-i central Gaza amakdang nisung 226 tepset**



VOL. XXI ISSUE NO. 238 (ADOK 238)

DIMAPUR TENTONÜ (MONDAY)

AAMI (JUNE) 10, 2024

₹ 5.00

## NDA 3.0: PM Modi-i kümsük tasembenbuba atema tezüngzüktep agiogo

New Delhi, June 9, 2024 (Agencies): Deobarnü Rashtrapati Bhavan nung Narendra Modi-i kümsük tasemben atema Prime Minister inyaksü tezüngzüktep agiogo.

Iba sentong nung Modi den külemi minister 72-i tezüngzüktep agia liasü.

India nung mezümbuba Prime Minister Jawaharlal Nehru-i dang kümsük asem atongtepa inyakba sülen tanü Narendra Modi (73)-i kasa jenjang tongtetogo.

PM Modi-i küm pungu atema Prime Minister tashi angur saka taküm Lok Sabha nung BJP-i sorkar akümtsü menden peria mengutetba ajanga pai tanga teloktem den tashi lemsateptsüsa akümtsü.

NDA 'coalition dharma' tangatetba nung Council of Ministers tasen nung nisung 72 lir aser parnok rongnung NDA nung yaritepa telok balala nungi minister 11 dena lir.

Modi 3.0 nung Cabinet Ministers 30, Ministers of State with Independent Charge 5 aser Ministers of State 36 lir.

Council of Ministers nung Other Backward Classes (OBC) nübo 27, Scheduled Castes (SC) 10, Scheduled Tribes (ST) 5 aser minorities 5 lir.

Deobar nikongdang Rashtrapati Bhavan kima nung President Droupadi Murmu-i Narendra Modi aser par Council of Ministers nem tezüngzüktep agidaktsü.

PM Modi'er Cabinet nung



Deobarnü Rashtrapati Bhavan NDA sorkar tezüngzüktep agiba sentong nung adentsü atema Prime Minister Narendra Modi arudang agiba noksa ka angur. (New Delhi, June 9)

züngsem tasen anioker rongnung BJP president JP Nadda, taoba Madhya Pradesh Chief Minister Shivraj Singh Chouhan, taoba Haryana Chief Minister Manohar Lal Khattar, Sundargarh MP Jial Oram, BJP Gujarat unit president CR Patil nung dena lir.

Modi 3.0 Cabinet nungsa tejenpur Amit Shah, Rajnath Singh, S Jaishankar, Nirmala Sitharaman, Nitin Gadkari, Piyush Goyal, Pralhad Joshi, Jyotiraditya Scindia, Ashwini Vaishnaw, Kiren Rijiju, Dharmendra Pradhan, Sarbananda Sonowal, Bhupender Yadav, Giriraj Singh, Gajendra Singh Shekhawat aser G Kishan Reddy nung dena lir.

NDA nung yaritepertem rongnung LJP (Ram Vilas) tanishir Chirag Paswan, JD(S) lennir HD Kumaraswamy, Hindustan Awam Morcha

ta Benjamin-i ashi.

BJP mesüra NDPP MLA maliba Assembly Constituency 23 nung BJP-i NDPP den tesentaktep yur candidate shima toktepdaktsütsü ta paisa ashi.

BJP aser NDPP tsüngda tangatettep nung menden lemsateptsü aser iba asoshi takok angutsüba candidate dak rangloksü. Iba sangdong ya NDPP den asüngdangya asüba sülen aser People's Democratic Alliance (PDA) sorkar taginüba nung ajemdaker metetdaktsür ta BJP Nagaland state unit president-isa ashi.

## Modi 3.0 nung Northeast nungi 3 denogo

Guwahati, June 9, 2024 (Agencies): Prime Minister Narendra Modi'er Council of Ministers nung Northeast nungi MP asem dena lir.

Par asem ya Sarbananda Sonowal, Kiren Rijiju aser Rajya Sabha MP Pabitra Margherita nung lir.

Pabitra Margherita-i tang

mezüng atema Modi'er Cabinet nung Minister of State inyaksü. Külen, Sarbananda Sonowal-i maneni cabinet minister ka ama inyaka aotsü.

Taoba mapang Modi'er cabinet nung Kiren Rijiju ya kanga tongtipang nisung ka liasü aser pai maneni cabinet minister ka ama inyaksü.

founder Jitan Ram Manjhi, JD(U) lennir Rajiv Ranjan (Lalan Singh) aser TDP MP Kinjarapu Ram Mohan Naidu nung Union ministers of Cabinet rank ama tezüngzüktep agiogo.

Maneni, Jitendra Singh, Ramdas Athawale, Nityanand Rai, Arjun Ram Meghwal, Shobha Karandlaje, Shripad Naik, Rao Inderjit Singh aser Krishan Pal Gurjar nung tanaben Ministers of State inyaksü tezüngzüktep agiogo.

Narendra Modi-i tezüngzüktep agiba sentong nung Congress President Mallikarjun Kharge aden. Rajya Sabha nung Leader of Opposition ka ama iba sentong nung adentsübaji 'constitutional duty' ka lir ta Kharge-i ashi. Ajisüaka Trinamool Congress aser Left dena opposition party lennir aikati iba sentong nung shilem magi.

Tanü Bangladesh PM Sheikh Hasina, Sri Lanka President Ranil Wickremesinghe, Bhutan PM Tshering Tobgay, Maldives PM Mohamed Muizzu, Seychelles Vice-President Ahmed Afif, Mauritius PM Pravind Kumar Jugnauth aser Nepal PM Pushpa Kamal Dahal 'Prachanda' nung iba sentong nung aden.

Maneni, Mukesh Ambani, Anant Ambani aser Kumarmangalam Birla nungeri

anir India nung shishilembar tetsüdi aika aden.

Külen, Shah Rukh Khan, Akshay Kumar, Vikrant Massey, actor Rajinikanth aser director Vidhu Vinod Chopra nung dena Bollywood celebrities aika sentong nung denogo.

Taküm Lok Sabha elections nung BJP-i aniba National Democratic Alliance (NDA) ajanga menden 293 nung takok nguteta liasü. BJP-i sorkar akümtsü menden 272 metongteti menden 240 nung dang takok angu.

### Union Ministers

Rajnath Singh (BJP)  
Amit Shah (BJP)  
Nitin Gadkari (BJP)  
JP Nadda (BJP)  
Shivraj Singh Chohan (BJP)  
Nirmala Sitharaman (BJP)  
S Jaishankar (BJP)  
Manohar Lal Khattar (BJP)  
Piyush Goyal (BJP)  
HD Kumaraswamy (Janata Dal Secular)  
Jitan Ram Manjhi (Hindustani Awam Morcha)  
Dharmendra Pradhan (BJP)  
Rajiv Ranjan Singh aka Lalan Singh (JDU)  
Sarbananda Sonowal (BJP)  
Dr Virendra Kumar (BJP)  
Kinjarapu Ram Mohan Naidu (TDP)  
Pralhad Joshi (BJP)  
Jual Oram (BJP)

Giriraj Singh (BJP)  
Ashwini Vaishnav (BJP)  
Jyotiraditya Scindia (BJP)  
Bhupendra Yadav (BJP)  
Gajendra Shekhawat (BJP)  
Annapurna Devi (BJP)  
Kiren Rijiju (BJP)  
Hardeep Puri (BJP)  
Mansukh Mandaviya (BJP)  
G Kishan Reddy (BJP)  
Chirag Paswan (LJP-Ramvilas Paswan)  
CR Paatil (BJP)

### Ministers of State

Rao Inderjit Singh (BJP)  
Jitendra Singh (BJP)  
Arjun Ram Meghwal (BJP)  
Prataprao Jadhav (Shiv Sena)  
Jayant Chaudhary (RLD)  
Jitin Prasada (BJP)  
Shripad Naik (BJP)  
Pankaj Chaudhary (BJP)  
Krishan Pal (BJP)  
Ramdas Athawale (RPI)  
Ram Nath Thakur (JDU)  
Nityanand Rai (BJP)  
Anupriya Patel (Apna Dal)  
V Somanna (BJP)  
Chandra Sekhar Pemmasani (TDP)  
SP Singh Baghel (BJP)  
Shobha Karandlaje (BJP)  
Kirti Vardhan Singh (BJP)  
BL Verma (BJP)  
Shantanu Thakur (BJP)  
Suresh Gopi (BJP)  
L Murugan (BJP)  
Ajay Tamta (BJP)  
Bandi Sanjay Kumar (BJP)  
Kamlesh Paswan (BJP)  
Bhagirath Choudhary (BJP)  
Satish Chandra Dubey (BJP)  
Sanjay Seth (BJP)  
Ravneet Singh Bittu (BJP)  
Durga Das Uikey (BJP)  
Raksha Khadse (BJP)  
Sukanta Majumdar (BJP)  
Savitri Thakur (BJP)  
Tokhan Sahu (BJP)  
Raj Bhushan Choudhary (BJP)  
Bhupathiraju Srinivasa Varma (BJP)  
Harsh Malhotra (BJP)  
Nimuben Bambhanian (BJP)  
Murlidhar Mohol (BJP)  
George Kurian (BJP)  
Pabitra Margherita (BJP)

## Tanü nungi Class VIII & IX Phase-1 Examination tenzüker

Dimapur, June 9, 2024 (TYO): June 10, 2024 nungi Nagaland nung Class VIII aser IX Phase-1 Examination 2024 tenzüksü.

Iba tatidang atema Nagaland Board of School Education (NBSE) portal www.nbsenl.edu.in nung routines lir.

NBSE-isa ajungbena sodi anogo denji yonga Examination routine memelenshitsü ta metetdaktsüogo.

Maneni, NBSE-isa June 11 nungi 21, 2024 tashi HSLC

Compartmental & Improvement Examinations 2024 aser HSSLC Compartmental & Improvement Examinations 2024 külemi agitsü.

HSLC Compartmental Examination 2024 atema kaketshir 3006 aser Improvement Examination atema kaketshir 81 tenüng agüja lir.

HSSLC Compartmental Examination atema kaketshir 1703 aser Improvement of Performance atema kaketshir 77 lir.

Compartmental tatidang nung

Arts streams nungi kaketshir 1227, Commerce nungi 62 aser Science nungi 414 lir. Ano Improvement examination atema Arts nungi kaketshir 8 aser Science nungi kaketshir 69 tenüng agüja lir.

NBSE portal nung statistics booklets upload süa lir aser HSLC & HSSLC Compartmental & Improvement Examinations 2024 agütsütsüpurtemi pei pei examination centres repranger Admit Cards agizüktsü atema metetdaktsüogo.

### Nübur asoshi Party ticket agi masü saka ni-ang inyaktsü: Aongsen Aier



Wb. Aongsen Aier

**Mokokchung, June/Aami 09 (TYO):** Küm 10 tejakdang nungi Municipal election agira election nung maongka agia Mokokchung town asoshi inyaktsü asoshi bilema aliba mapang ka nung Municipal election agitsüsa mapang agi bener arutsünung sarasadema ataba atalokerta Mokokchung town nung Ward No.3 arkong ward nungi ULB election nung

candidate Wb.Aongsen Aier-i Arkong ward nung par kidang Mokokchung nung osang zülurtem den pa ULB election nung noktakba nükjiding aser tebilembatem lemsatepba mapang ashi.

Municipality maliba ajanga Mokokchung terenlok makai talangka dang lia aruogo, Jorhat aser Mariani leni mapangshia ludangdang aluba aben melenshir alir, süra asen Mokokchung-bo kodata aiben temelungshia bilemerta Aongsen-isa lemsatep.

Aongsen-isa Arkong Ward nungi Municipal election nung tokteptsü asoshi mulungteter kelen kecha party ticket-a magitsü mulungtet, kechiaser ticket jagi inyaktsü masü saka pai(Aongsen) inyaktsü, anungji nüburtemi tang ULB election agiba nungya pa nem maongka agüja adoktsüra, pa renema lirta nüburtem dang metetdaksüba olen ka shisem.

ULB election nung adokerangbangla ta sür jilia

kecha menangzükler saka, ULB election nung adoker kelen "ni odi,ni reprangdi,ni bener arudi aser yamai külemi teka mateper inyakdita sayunerta" Aongsen-isa pai nübur asoshi inyaktsü aliba nung külemi inyaka aotsütem dak yimdangloka ashi.

Aongsen-isa tang tashi nung Arkong ward nungi candidate par asem(3) lir anarongnungji ka pa senior aser ka pa junior, par asem rongnung shiba adokdir madoker ana jagia tatokersang denji külemi teka amteper Arkong Ward aser Mokokchung town ya kü temelungjangta angateta inyaktsü tangatetba lirta ashi.

Aongsen Aier ya arishi küm 46 tain Mupongchuket nunger 1971 küm tsürabur kibong kümmer kelen 1973 Arkong Ward-i arua ali aser pa 1979 küm May 4 nü Arkong ward nung soa lia inteta tang tashi Arkong ward nung alir.



"Telungjem ajanga terenlok" omen nung ajemdaker April 27, 2024 nü Dimapur Langpangkong Watsu Telongjem (DLWT) tentetba sülen Nungtet Luden ajanga DLWT 2024-26 kümsük atema ketdangpurtem tir Wt. Aienla Jamir (Akhoya), tatong tir Wt. Alemla Imsong (Unger), tongti zülur Wt. Amongla Imdong (Kangtsung), repsem zülur Wt. Anungla Jamir (Changtongya), sen otsü zülur Wt. Imlirenla (Chuchuyimlang), sen otsü zülur yarila Wt. Temsurenla (Yaongyimsen) aser kimen Tali Pongener (Asangma) shima June 8, 2024 nü Dimapur Langpangkong Senso Telungjem kumen kidang telungjem senden ka mena liasü.

### CANSSEA-i arok ajungtsü atema inyaktsüla: Dr Chüsi

**Kohima, Aami/June 09 (TYO):** CANSSEA ya sorkar mapa inyaker temeden asoshi ola adokba sapang ka dang masü saka nübur ajunga asoshi inyaktsüla, ta Commissioner & Secretary, Dr Zasekuolie Chüsi-ashi.

Hotel Japfü, Kohima nung June 7, 2024 nü Confederation of All Nagaland State Service Association (CANSSEA) pur küm asem nung khen amungba mungdang nung Commisioner & Secretary, Transport aser Director, Census Operations, Nagaland, Dr Chüsi ajanga iba tayongzükba ya agütsü.

CANSSEA teinyatsü mapa tulu lir, kechiaser iba kübok service associations aika lir aser ibai welfare association dang masü tongtipang tentet ka lir, ta pai ashi.

CANSSEA ya lokti tentet tain ka ama kanga junga shisadanger telemtetba agitsüla, kechiaser Naga nungeri parnok ya sorkar len aniba tashi ka ama

repranger, ta Dr Chüsi-i ashi.

Pai CANSSEA züngsemtem dang nüburtem ajangzüktsü mechi pei mapa nung temulung agüja inyaktsü aser sorkari policy balala yangluba nung len anitsü ayongzük.

Tir o jembidang Dr Ilang-i ashiba agi, par team-i 2021 küm February ita nung menden agizükba sülen takok anguba 31 liasü.

Item rongnung IAS induction atema Chief Secretary Nagaland nem representation agütsüba, service promotion atema qualifying years ajemtsü representation agütsüba, NPSC chairman ajuruba, mapang shidak nung anticipated vacancies atema DCP agütsüba, North East States Government Employees & Teachers United forum ayongzükba, NPS agientsü aser OPS tanaben benoktsü atema linük tesem ajunga nung longkak aitdang shilem agiba,

danga services den shisadokden senden amenba aser Core Committee amala tentetba lir.

Iba mungdang nung General Secretary, Audit aser District CANSSEA Units indang report agitepa liasü.

Convenor Search Committee M. Ben Yanthan ajanga 2024-27 kümsük atema ketdangpurtem tenüng sangdonga liasü.

CANSSEA 2024-27 kümsük atema tir Zubemo Tsanglao (Skill Development) aser tongti zülur Yhensenlo Kent (Fisheries).

Iba mungdang ya CANSSEA vice president Chubayanger lenisüba kübok agi aser Associate Pastor City Church Zajamo Odyuo ajanga sarasadema sentong tenzük.

Sentong nung Vesavol Rhakho aser Medotole Lhousa nati temeja ken ka aten aser Joint Secretary, Visetonuo Angami-i melepzüng o jembia liasü.

### Amoklushi awatsüng nung ango chanu tenla aguja puoktsü



Anglers Association Mokokchung aser Department of Fisheries, Mokokchung semtepa Amoklushi awatsüng, Chuchuyimpang nung ango techanu puoktsüdang tangokba noksa.

**Mokokchung, June/Aami 09 (TYO):** Anglers Association Mokokchung aser Department of Fisheries, Mokokchung semtepa tanu Amoklushi awatsüng, Chuchuyimpang nung ango techanu pack 50(50 packs of fingerlings)tenla agüja angati dang puoktsüogo. Anglers Association Mokokchung aser Department of Fisheries, Mokokchung-i iba ama teyari mapa tajung inyakba asoshi Chuchuyimpang Village Council ajanga tepelaba metedaktsü.

### GPRN/NSCN (Unification) sorkar ka dang lir

**Dimapur, Aami/June 09 (TYO):** Telok balala nung Naga national workers ajunga ka kuma lungjemtsü Naga nungeri ayongzükba aser tejangraba den lirumedema GPRN/NSCN ya tentet. NSCN-IM aser NSCN (Khaplant) nungi tangatetba kasa aliba linük tenzükler temi mapang talangka nungi 'unified Naga national government' ka dang alitsü asoshi inyaka aruba ama 2007 küm lungjemer GPRN/NSCN kübok sorkar ka tentet, ta GPRN/NSCN (U) indang sangdong ka ajanga ashi.

Iba mapang nungi 'GPRN/NSCN' nungja aser 'Unification' ojang ka tetetzü ka dang lir. Tawa lenir melentepba sülen nisung kari GPRN/NSCN (Unification) nungja meshidak meyipzükba aser mashi lenmang nung amshiba ajanga Gen.(Retd.) MB Neokpao Konyak, President aser Ino. Alezo Venuh, Ato Kilonser lenisüba kübok GPRN/NSCN (Unification) government ka

dang lir ta jangjashitsür, ta ashi. Anungji state nung aliba nübur ajak saksalema alitsü aser Gen.(Retd.) MB Neokpao Konyak, President aser Ino. Alezo Venuh, Ato Kilonser nati aniba dak alaka GPRN/NSCN (Unification) tenüng amshiba danga telok/entity kecha magizüktsü metetdaksür, ta GPRN/NSCN (U) sangdong ajanga ashi. Hokishe Zhimomi, Kilonser, Care-taker, Sumi Region aser Mhondamo Ngullie, Kilonser, Care-taker, Lotha Region, GPRN/NSCN (U) natia Zunheboto district Wokha district nung aliba nüburtem dang President Gen. (Retd.) M.B. Neokpao Konyak aser Ato Kilonser Ino Alezo Venuh nati aniba GPRN/NSCN (U) dak alaka danga telok/entity mali, ta sangdong ka nung metetdaksüogo. Nisung kari danga GPRN/NSCN (U) tenüng amshiba metetra tapet temerenshi agütsütsü, ta sangdong ajanga ashi.



Tang nungi tenzuka ita ana tsungda nungsa Amguri-Mokokchung Road , NH-2 nung Chainage 209 nungi 400 tashi ali atuba mapa renemtsüla ta Langpangkong Tzükong Mungdang Road Co-Ordination Committee (LTMRC)-I lenmang yanglur company nem mapang aser mapa lateta agütsüogo. LTMRC-isa kasa lenmang meshitaki yangluba reprangteta yanglushitsü metetdaksüogo. Iba lenmang yangluba maparen dak aketba ken o tem ya June 08, 2024 nü Merangkong Medemsanger Putu Salang nung LTMRC purtemi PWD (Highways), contractor aser suide engineertem jaoka jembia liasü. Iba lenmang ya KBB company-i inyaker.

### Modi-i PM tenangzükba agiba sülen mezüng Italy semdangtsü



June 09, 2024 nü New Delhi nung linük Tir, Droupadi Murmu-i ketdangtsüa Narendra Modi nem Ato kilonser tenangzükba agidaksüdüang tangokba noksa nung angur.

**New Delhi, Aami/June 09 (Agencies):** Amongnü nikongdang Narendra Modi-i kümsük tasembenbuba Ato kilonser inyaksü atema tenangzükba agiba sülen pai mezüng Italy semdangtsü aser Apulia, Italy nung ayongzükba G7 Summit nung adentsü. Taküm April ita nung Italy Ato kilonser, Giorgia Meloni-i G7 senden nung adentsü atema Ato kilonser, Narendra Modi

jaoka liasü. June 4 nü BJP-i aniba NDA teloktepi Lok Sabha election nung takok anguba sülen Modi nem tenüngsang agütsür mezüngpurtem rongnung Meloni densema liasü. X ajanga Meloni-i Modi nem tenüngsang agütsü aser Italy o India na tsüngda tesendaktep tashi itshitsü atema linük anati maneni longjemmer inyakba den külemi

lenla balala nung amalitepa inyaksü, ta metetdakja liasü. G7 Summit nungji Observer linük ka ama Modi adentsü. Yaküm Japan kübok Hiroshima nung ayongzükba G7 Summit nunga Modi dena liasü. June 14 nü Ato kilonser Modi Italy-i aotsü. Iba mapang nungji pai outreach session nung jembitsü aser G7 lenirtem den jurila senden amentsü.

### Joko taoba mapang ama Parliament nung tashi mamshitetsü: Sonia Gandhi

**New Delhi, Aami/June 09 (Agencies):** Amongnü Narendra Modi-i Ato kilonser tenangzükba agiba anogo nung Congress Parliamentary Party nung chairperson Sonia Gandhi-i, tamakok anguba atema Ato kilonseri khuret magir, ta aitsü. CWC senden nung jembidang Sonia-i, "Ato kilonseri par party aser teloktepi nung aliba party tem sendoker pa tenüng nung dang nüboyima liasü, ibayongji yimtenren tsütsü tamakok angu. Atangji nung pai bushiba takok pai mangu, ibayongji lenisütsü atema-a pai temeden mangu," ta ashi. "Ajisüaka tamakok anguba atema khuret magii pai ano maneni tenangzükba agitsü atema bilemer. Pai yimsüstübaren yimya melenshitsü aser nüburtem taginüba ataloktsütsü, ta onoki pa dang nungi meimlar," ta lai ashi.

reprangtsüji Congress Parliamentary Party teinyaksü mapa lir. Ibayongji CPP züngsemtem ama asenoki mita reprangtsüla," ta ashi. "Tesüiba küm ter nung atalokba ama joko Parliament nung tashi mamshitetsü mesüra mamshitsüla. Joko Parliament nung timtem adokdaksütsü atema sorkar nem temelaba magütsütsüla, züngsemtem dak tim mesü mebenshitsüla mesüra o metoktepi ozüngtem magizükdaksütsüla. 2014 küm nungi parnoki inyakba ama masü saka tang nungibo Parliamentary Committees mesendoktetsü mesüra mesendoktsü," ta lai ashi. "Tesüiba küm ter nung atalokba ama joko Parliament nung ola menembangtsütsü," ta taoba mapang Congress Tirisa metetdaksü. Tawa agiba Lok Sabha election nung BJP-i menden 240

nung takok angu aser NDA densemabo parnoki menden 292 angu. June 5 nü National Democratic Alliance (NDA)-i Modi lenir shimba sülen Amongnü nikongdang Modi-i Ato kilonser tenangzükba agiogo. Modi-i tang agi kümsük (term) tasembuba Ato kilonser inyaksü atema tezüngzüktepi agiogo, ajisüaka kümsük abensaa inyaksü asü meinyaksüar ibajibo tarutsü nung ang metettsü. Modi jakdang Jawaharlal Nehru aser Indira Gandhi natia kümsük asem abensaa Ato kilonser inyaka liasü. Nehru-i küm 16 ser anogo 286- 1964 küm pa tasünü tashi Ato kilonser inyaka liasü. Ano India nung tetsürtem rongnung mezüngbuba Ato kilonser, Indira Gandhi-i küm 15 ser anogo 350 Ato kilonser inyaka liasü.



June 09, 2024 nü New Delhi nung Indian Youth Congress (IYC) National President, Srinivas BV den youth wing züngsemtemi NEET 2024 tatidang nung ochimashi inyakim anema longlak aيتدang tangokba noksa nung angur.

### June 12 nü Odisha nung tang mezüng BJP sorkar tenangzükba agitsü

**New Delhi, June 09 (Agencies):** Odisha nung tang mezüng BJP sorkari June 10 nü tenangzükba agitsü liasü saka June 12 tashi atsülangogo, ta party lenirtemi metetdaksü. BJP lenir Jatin Mohanty aser Vijaypal Singh Tomar nati, Ato kilonser, Narendra Modi sentong kar nung mazüngi aliba agi anogo atsülanganger, ta metetdaksü.

Chief Minister menden arishirtem rongnung pa densema lir, ta olulu jembitenzükogo. 2019 küm Lok Sabha election nung Pujari-i Bargarh menden nungi takok ngua liasü aser tawa agiba assembly election nung pai Brajarajnagar assembly menden nungi takok angu. Central lenirtemi nüngdak kar jembitsü atema pa jaok südi, ta pa pusemertemi ashi. Tang tashi nungbo BJP central lenirtemi Chief Minister menden atema shinga meshim aser Honibarnü Odisha nung BJP Tir Manmohan Samal-ia anogo ana tsüngda Chief Minister shimtsüa akok, ta osangbenertem nem metetdaksü.

Mohanty-i, Amongnü Modi Ato kilonser tenangzükba agiba sentong nung pa kanga mazüngi alitsü aser Hombarnü pai party MP tem ajurutsü; iba dak alia June 11 nü Odisha nung tang tasen shimba MLA tem mezüngbuba legislature party senden amentsü, ta metetdaksü. Election atema nüboyimba mapang nung Ato kilonser Modi-i, Odisha nung tang mezüng BJP sorkar tenangzükba June 10 nü agitsü, ta sangdonga liasü aser Honibarnü Odisha BJP Tir, Manmohan Samal-ia June 10 nü tenangzükba agitsü, ta metetdakja liasü.

Assembly menden 147 aliba Odisha nung BJP-i menden 78 nung takok nguteta liasü. Iba election nung parnoki chief ministerial candidate mesangdongi toktepa liasü. Odisha nung BJP sorkar tenangzükba agiba sentongji June 12 nü Bhubaneswar nung aliba Janata Maidan nung agitsü, ta lenirtemi metetdaksüogo.

Ajisüaka anogo ana atsülangtsü atema Amongnü teletmetba agiogo. Ano külen Odisha nung BJP nungi mezüngbuba Chief Minister ji shiba asütsüar tang tashi meshim. BJP lenir tain aser tang shimba MLA, Suresh Pujari New Delhi-i aoba ajanga

Assembly menden 147 aliba Odisha nung BJP-i menden 78 nung takok nguteta liasü. Iba election nung parnoki chief ministerial candidate mesangdongi toktepa liasü. Odisha nung BJP sorkar tenangzükba agiba sentongji June 12 nü Bhubaneswar nung aliba Janata Maidan nung agitsü, ta lenirtemi metetdaksüogo.



June 09, 2024 nü New Delhi nung Bangladesh Ato kilonser, Sheikh Hasina-i (abelen) BJP lenir tain, L.K. Advani ajurudang tangokba noksa nung angur. Narendra Modi Ato kilonser tenangzükba agiba sentong nung adentsü atema la Delhi-i arua lir.

### Canada intelligence nung Director-i India anaben miima semdang

**New Delhi, June 09 (Agencies):** Canada nunger intelligence agency nung tongti, David Vigneault-i taküm February aser March ita nung India anaben tashi miima semdangogo.

Canada na tsüngda tesendaktep raksa. Trudeau-i India nem tai tongloktüyonga India-ibo ibaji magizüker. Vigneault-i February-March nung India anaben semdangba sülen hopta ishika dang lir Canada ketdangsertemi Nijjar tepsetba ken o dak sendakba nung India nunger asem-Karanpreet Singh (28), Kamalpreet Singh (22) aser Karan Brar (22) nunger apu. Iba sülen mapang tatsüka tsüngda Canada ketdangsertemisa India nunger Amandeep Singh apu.

Canada nung Khalistani lenir, Hardeep Singh Nijjar khasetba ken o dak sendakba nung India nunger ketdangsertem nem osang metetdaksütsü atema pai India semdang, ta osang angazüker. Canadian Security Intelligence Service (CSIS) nung Director, Vigneault-i Ottawa nung bushisüngdangba mapang bushitetba osang kar lemsatepogo. Yaküm September ita nung Canada Ato kilonser, Justin Trudeau-i, Canada senso Nijjar tepsetba nung India-i shilem agia lir, ta tai tongloktütsüba mapang nungi tenzükba India aser

Canada ketdangsertemisa India nunger Amandeep Singh apu. India-i Nijjar ya kiralongrar, ta sangdonga liasü. Yaküm June 18 nü Canada kübok Surrey nung aliba gurudwara ka kima nisung kari Nijjar khaseta liasü. Iba ken o ya Royal Canadian Mounted Police (RCMP)-i bushisüngdangdar.



## TIR YIMYIM YIMOBILEM (EDITORIAL)

DIMAPUR TENTONÜ, JUNE (AAMI) 10, 2024

### Ayong aok tenzüker

**A**senoki kilong kimabo aoker saka tang tashi nung Nagaland nung ayong tashi aokbabo mangashi aser mengudang, ajisüaka asen lima nunga ayong dena aoktsüsa mapang agi tongogo. Aji asenoki mashi-memetetba kisung agi masü saka mekümdang aser mebilemdangi anak ona-talisa kümsa küm shirepa maotsüba plastic osettem tesem mashimashi nung endokba ajanga ataloker. Aji oda, Doyang ayong temdang electric light adokdak joko plastic agi ayonga mangu nembanger aliba noksa ka 'social media' nung prokshiba ngua Chief Secretary-i government nung tongtibang ketdangsertem kar jatepa senden aliba sülen, Wokha nung Deputy Commissioner-i anir Disaster Management, Forest department, Fishery department, Water Resources department aser NEPCO nung inyakertem ayongteper Doyang ayong plastic jana-onatem agi nembanger aliba aok tenzüker. Doyang ayong temdang light adokdaksüba agi nübertem nem electric light agütsüba dang masü saka temeket yimtsüngtem nung alirtembo iba temdang ya awatsung tulu kümer ango metsüa ayoker, raliwalirtem arua amongba nungi senotsüa ajanzüker aser tzü dena mesüa oa agitetter. Aji oda, hydro electricity project ka yanglutetba ajanga nisungtem dang masü saka shirururtem dena talisa molulem ozütembo küm shia alima talang nungi arua monger aoba asenoki angashir aser angur. Iba ama nungtugu aser tongtibang ayong ka, tangari masü, asenok sensosanger aser lisopurtemi peii amshiba plastic osettem aser polythene agi nembangtsüsa inyakba jagi ayong nung taküm melitetsüsa menendaksüba dang masü saka alima dang asenok mashimalu tuluka sayur. Atangji, Doyang ayong nung bendenba plastic janaonatemji yangji amongertemi endokba masü saka asenoki asen alidak kima yimdong nung plastic osettem, talisa 'polythene bags'amshir endokbatem to agi ayong atongbatem lir. Asenokibo asen kidang aser shishilembadak asenoki amshiba plastic oset tejen tilaka mesüra polythene bag ka ana amshir tekulen mesüra aremlen tesem mashi ka nung endokbaji asenok mapa atemer amai bilema alitsüa akok saka ibaji asenok kija atema masü, alima rangben atema tebilemtsü agütsü tenzüker ta asenoki bilemdi. Asenoki rajemtsüba kaji, pei kidang aser pei alidak amshir tesem mashimashi nung endokba plastic aser polythene janaonatem ajak to tanem-tanemi tzunglu arudang kar khen, kar khen ta motzü agi ponger luagi ayongtem atonger aser ayongtem nung jagi tzuim atonger ta küm ishika nungbo tzuim aser ayong ajak plastic osettem agi nembanger ango, akong aser tsüngentema taküm melitetsüsa kümadoker. Item plastic jagi ayong telonglen ali o tzü na bendangdaksür aser ayong agi ali takong kümdaksür. Kena asenok ajak tia ajung, Doyang ayong plastic agi nembangbabo nisung kari video tangoker social media ajanga belenshiba agi government nem arrsangoktsür amai küma ayong ajak merükteta aok tenzüker. Iba kasaji asen lima nung tzüla, milak aser menüng ama ayongtem nunga, shingaia video tangoker mesayuba agi government nung teinyaktsüpurtem tenaronga marepzür dang ashi, plastic agi ayong ajak tangoa mesaputsüsa nembanger alitsü. Tangbo asenoki endokba plastic aser polythene osettem agi ayong atongba indang dang jembir, saka asenoki kidang nungi endokba item ama plastic janaonatemji ano teimbaka ayong matong ser tom nung arem meta balala nung prokshia ali telongleni tzüa maitsüsa alijak ajak nembanger lir. Item jagi asen alidak tzü rosepdaksür aser süngdonglidong meyitsü mekoki kümdaksür. Itemjia tangsa oktetsüla. Atangji, ayong aser arem nungi item janaona oktentsübaji government dak imlatsü mali saka asen alidakbo asen mapa asütsüla. Aji oda, ayong akartemibo küm nung anogo ka agiteta yimkong ayong aser arem nung plastic janaonatem endoka merüktetba anogo among nungbo koda tajangzük aser tajung süla ta bilemer. Atangji, bendener endoktsübajia mashimashi endoktsüba masü, ajia inyakyim ka alitsüla. Iba amaji, küm ka ana yimkong nübodoka inyak nung, iba sülenbo shingaia plastic agi yangluba nanglonglep tilakata yimdong nung mashimashi meindoktsü.

## OLEMSABANG

### Tim masüba lenmang nungi bendenba rongsenji juli tapok nung enoktsü

~ L. Kika Pongener.

(Yashi adok nungi...)

Laishiba nung Hagai-1:6 nungji züngra..."Aser shibai sen aah-er juli tapok nung enoktsü aah-a arur...ta temeranger Kibubai ashir"...ta shia angutsü. Asenok sen aah-a aruba ajak juli (Yangkü) tapok nung enoktsü...ta ashirba masü, saka ochi lenmang nungi masü, mashilen lenmang nungi bener aruba rongsenji juli tapok nung enoktsü atema bendener...ta ashir. Asenoki kanga junga shisadagra, juli tapok nung enokba tetezü...Asenoki juli nung senji enokli tapok nungi tsükli"...ta asüba amai...Asenoki aah-a bener aruli...Yakta dang memetetba/meimlaba lenmang kar nung endoktsü lenmang lapoka atali ta-sa asütsü. Ashiko, jala-jabaso tamajung kar inteter, parnoki lalushiponga endoktsüa akok, mesura ajongben kitsük-kirong lendong aser accident kar ataloker endoktsü akok, mesura tashitak tulu kar keter mozü-mora nung, operation agiba nung endoktsü akok, mesura meimlaba nisung kari rakzükrakdema/auyaa bener aotsü akok...!!! Mesura Election ama nung angadi nung tangar kar jonglongdaksütsü, mesura kar den tashi (Power) sayutepa toktepdang, mesura kar tashiyim agi akoktsü atema supokrem amshiba nung endoktsüa akok. Ano Hagai ainkar-i shinba..."Nenoki jenti prok saka tera dang bena aru, nenoki chiyunger saka nenok tepok masünger, nenoki ajemer saka tzüra matemer, nenoki suoshi abener saka shinga talembo mali" (Hagai-1:6). Tanü putu nung nisung karbo, rongsen aika endoka (Investment) mapa tulu inyak, saka yimlaba ama masü tera dang tajangzük (Profit) angu...mesura tajangzük mali noksen (Loss) asü, ano alu tuluka ayim, saka tsükbo tera dang aro. Ano karbo rongsen aika yur, chiyungtsü tajung jenti chir-a mechimai nangdaka yur, saka pei temang nung tashitak tamajung kar keter, chiyungtsü mechitetba nisung karbo lir. Aben-suoshi sen aika jenjang agir-magima nangdaka yur, itemji semokyongjia/apenyongjia talem asü temokong'ar memeteteter...Temang-shi sua-adoker (Paralysed). Rongsen-bo aika rizünga lir, saka yipten nung zükdaka mejanga yur, anu kodang adoker kodang alur memeteti anogo suidaktsüba karbo lir...Tsüngrem o-i ashir..."Tilaka dang chiaka aluyimer (Sensaker/Tilar) ayipjanga mejanger; Saka takar moshia akayongpo pa ayip majanger" (Sayu-5:12).

Temeim Khristan tamanger tajungtem, asenoki alima nung ya, asen ket nung sen/rongsen aika lira jangradema alitsü amai bilema, tim masüba lenmang aser ochimashi inyaka rongsen bendentsü meranger. Nisung aikati lokti rongsen ketdangsua amshidang, pei agitsü asoshi ochimashi alozüka bendener, saka item rongsenji kopi meli-i memetetba lenmang kar nung, amajok nung dang endoktsü...Juli tapok nung enoktsü asoshi bendener dang asütsü. Election arura tiyazü agi jembizüka/alozüka aser pei temeden vote yoka chia rongsen bendener. Ajisuaka, tim masüba lenmang nungi bendenba rongsen jagi asen temang nung/kibong nung timtem-ang talila kar bendenloktsüba bendener dang asütsü. Yisui Mojing dang langzüba ama..."Nisung am tesa agi taküm malir". Atangji, asen mimchir ya sen/rongsen kisung agi taküm malir. Asenok ya Tsüngrem bang nungi kazüka yokba 'o' agi aser Tsüngrem taochi agi taküm alir. Tsüngrem o-i ashir..."Temeshiba den ishikaji, ochimashiba tajangzük tulu dang nungi tajungba" (A.Shin-16:8). Atangji, ochimashi bendenba rongsen aika dang nungibo, ochishia bendenba rongsen terakaji kanga agi tajungba lir. "Tiyazü temeli agi anguba rongsenji meyipzüa alungba tangola; Shirnoki itemji bushir parnoki tasüba bushir" (A.Shin-21:6). Anungji asenoki ochishia, meranga inyaka rongsen bendendi. "Ajongben anguba rongsenji ajema akümtsü; Saka züsenba agi terara shibai bendendir pa züintsü" (A.Shin-13:11). "Timtem keter rongsen tulu akaba dang nungi; Kibuba tsübuba den tera akaba tajungba" (A.Shin-15:16). Asenokitim lenmang nungi rongsen bushia kibong taküm mesua alitsü merangdi.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# Caritas-i Rohingya refugee tem maneni yaritsü ayongzükür



June 01, 2024 nü Bangladesh kübok Cox's Bazar nung aliba Ukhia camp mi agi rongdokba sülen Rohingya refugee tem adenshia aliba noksa nung angur.

**June 09, 2024:** Alima nung Khristan melungtet telok-Caritas Internationalis-i Rohingya Muslim nunger refugees aser Myanmar nung rara ajanga kongshirtem yaritsü asoshi dollar sen million 7 bendentsü, anungji iba maparen nung yaritepdaktsüner, ta ayongzükogo.

Caritas Internationalis nung secretary general, Alistair Dutton-i, "Asenoki Rohingya nungertem mamadoktsüla mesüra Bangladesh sorkar nungi teyari angutsü meimlatsüla," ta ashi.

June 9 nü Bangladesh yimtiba, Dhaka nung osangbenertem den jembidang Caritas International nung lenir, Dutton-i, "Tanü alima nung kanga timtemba nüburtem rongnung Rohingya kibongtem densema lir. Mapa inyaktsü atema parnok nem temeden magütsür," ta ashi.

Bangladesh kübok Cox's Bazar nung aliba Rohingya refugees camp semdangba sülen osangbenertem den jembidang Dutton-i, "Tainlonglongpurtem akümüli tesadang shibo refugees camps nung amajok nung süidaktsüogo," ta ashi.

Myanmar nung rara ajanga jena arurtem million 1 dak tema Bangladesh kübok Cox's Bazar nung aliba Rohingya refugees camp nung jenoka lir, aser iba camp ya alima nung refugees jenoka aliba camp tulutiba lir.

Tawa Pope Francis-i Rohingya refugee tebilemstü bentettsü atema asentenshir inyaktsü ayongzükba sülen Dutton-i Rohingya refugee camp semdangur.

2017 küm Pope Francis-i Bangladesh semdangba mapang nung pai Rohingya telok ka ajurua liasü. Tang Ukraine aser Gaza Strip nung rara aliba ajanga alima nung telok balalai Rohingya

nungertem yaria aruba kanga ajema kümogo.

Caritas Bangladesh-i ashiba agi, alima nung telok balalai Rohingya refugee tem chiyungtsü atema ita shia nisung ka atema dollar sen 12 agüja aliba nungi tangbo sen 10 dang agütsür, ta metetdaktsü.

Iba dak alia Bangladesh nunger sen jenjang kanga ajema kümogo aser chiyungtsü nunga jenjang kanga tuogo.

Bangladesh-i refugee tem yaritsü atema dollar sen million 852.4 meshir. Linük nung refugees tali aruba nokdangtsü atema arrtsülen security akangshiogo.

2024 küm Caritas International-i Rohingya refugees nem dollar sen million 7 agütsütsü nükjidong lir. 2017 nungi 2023 küm tsüngda Caritas-i Rohingya refugees yaridang US nunger dollar sen million 45 indokogo.

# World Youth Day ajanga S Korea nung Arogo asentenshitsu

**June 09, 2024:** South Korea Arogo nungi lenirtem teshimtet telok kati Vatican semdangba mapang nung parnoki, 2027 küm South Korea yimtiba, Seoul nung World Youth Day (WYD) ayongzükba amongba ajanga linük nung Arogo asentenshitsu, ta metetdaktsü.

Seoul nung tongti putir, Peter Chung Soon-taick aser Auxiliary Bishop Paul Lee Kyung-sang na leniba nung teshimtet telok kati May 23 nungi May 25 tashi Rome semdanga International Youth Pastoral Congress nung aden aser May 27 nungi May 28 tashi consultation senden ka nung aden, ta Seoul Archdiocese-i sangdong ka ajanga metetdaktsü.

International Youth Pastoral Congress-i ayongzükba sentong nungji linük 110 nungi tejaoker 300 shi aden aser senden nungji youth ministry atema jembiba den külemi World Youth Day Seoul 2027 atema terenemshiba jenjang

asadanga liasü. Iba senden nungji jembidang Seoul nungi tongti putir Chung-i WYD 2027 dak sendakba onük minute 30 shi jembia liasü.

Paisa, Seoul nung World Youth Day ayongzükba amongbaji linük nung Arogo asentenshitsu atema maongka tajung ka asütsü aser yimsü balala amangertem tsüngda telongjem alitsü asoshi ajungshitsu, ta metetdaktsü.

2027 küm Seoul nung WYD amongtsü atema tezüngzüktep ka agiogo aser ibaji Dicastery aser Archdiocese na tsüngda tesendaktep tetenzükür asütsü.

South Korea-i meyipa aruba sülen WYD Seoul 2027 atema tentetba Local Organizing Committee nung General Coordinator, Bishop Lee-i June 7 nü World Day of Prayer nung diocese ajak nungi putirtem ajurua jembio.

Iba anogomong sentong nungji Lee-i Tsüngrem osang

sangdongtsüji kanga tongtibang, aser 2027 küm linük nung WYD amongba ajanga Arogo asentenshitsu mangdang lir, ta ashi.

Lee-isa putir ajak dang WYD 2027 atema terenemshiba nung shilem agitsü ayongzük.

WYD 2027 atema official sentongji taküm July 28 nü tenzüksü.

World Youth Day ya küm asem shia khen ayongzükba amongba sentong ka lir. Iba anogomong ya mezüing 1985 küm Pope John Paul II-i tenzükja liasü.

Hopta piyong agiba sentong nungji alima tesem balala nungi Khristan lanurtem adenshia osangtajung ken atener, tsüingsanger, sarasademer aser Tsüngrem O lemsatepa amonger.

2023 küm World Youth Day August 1-6 anogotem nung Portugal yimtiba, Lisobon nung among aser iba sentong nungji linük 200 nungi lanur 354,000 aden.

# ANOGO ABEN TSÜNGREM DEN

## Tenüing Asangba Kongki Ka

T.Ken 150: 1-6

Laishiba nung ken kaket Tenüingsang Kenji lir aser ken züluri tatem tenüing asangba aser tekülem indang asenoki metettsü Tsüngremi aginer ta tatsü agi jangjatsür. Khristan tamangji ken atenba aser tetushi agütsüba tamang lir. Asenok akaba ama tanga tammangba yimsü nung tenüing asangba aser ken atenba mali, kechiaser asenok mulungjang nung asenok Kibuba ken kar. Ken züluri iba ken nung tasüngdangba kar langzür.

Asenoki asangbaji shiba? "Kibuba sangang" (t.1) - arogo masü, sayutsüingir masü saka Kibuba. Asenok tebilemstüji asenoki aiben Kibuba mangur. Asenoki Tsüngrem nungi sempet anguba mesüra manguba repranger. Asenoki ashir, "Kechiba Kibubai ya meinyak, mesüra kechiba ibai balaka inyak?" Asenoki Pa shidakba mangur. Asenoki sempetji atema tagütsür dangi odi. Asenoki temoatsüji atema moatsüsang dangi odi. Asenoki Kibuba sangdi. "Teti Kibuba nung pelaang; tanabena ni shiti, pelaang!" (Filipi 4:4).

Asenoki Pa kong asangtsü? "Pa temeshidak Tsüngrem sangang, anüing ali tsüngda nung Pa ain asoshi tenüing sangang" (t.1). Koda jangratemtsü teloktep ka. Kodang asenoki tenla kidang Tsüngrem tenüing sangdir, ibai kotak nung tenyartemi tenüing asangba ama lir. Tekülemdak mesüra kechi nungsa asenok lidir, asenoki Tsüngrem tenüing sangdi.

Kechiba asenoki Pa tenüing asangtsüla? "Pa tashi tulu mapa asoshi Pa sangang; Pa kanga uluba asoshi Pa sangang" (t.2). Pa kechi aser Pai kechi inyak iba asoshi asenoki Pa tenüing asanger. Asenoki Pa koda asangtsü? Jangzü ola agi, tzürang kongki aser tawaba kongki agi, asem atemba agi, tsüingsangba agi, lisü aser jemji kongki agi Pa sangang. Ken züluri ashir, "Kongki ajak bendenang. Nai akok tashi kongki bendenang aser asenoki Kibuba sangdi". Kari ibaji maginür, saka asenok dang Pa ola tulu agi külemtsü ozüing agütsü.

Tanü yimya ajaki Kibuba tenüing asanger saka nüburi Pa amadoker. Ne sasa ken 150 nung tenüing asangba indang asüngdangang aser ken züluri langzüba shisadangang. Nai aika nung tenüing asangtsü kar. Pa tenüing asangba ajanga Tsüngrem mulungjang nung tepela bener arujang.

# Iraq nung Arogo lenir kati linük nung Khristantem yaritsü mepishir

**June 09, 2024:** Iraq nung Arogo lenir kati, Iraq nung aliba Khristantem renloktsü atema Khristantemi teyari kanga nüngdaker, ta metetdaktsü.

Küm ter tejaklen ISIS kiralongrartemi Iraq kübok Mosul yimti amakba mapang nung Khristan aika jenshia liasü.

Aid to the Church in Need (ACN) den jembidang Erbil nung Archbishop Bashar Warda-i, par Arogo nungia Khristan kibong 13,200 shi Kurdistan-i jena oadokogo, ta metetdaktsü.

2014 küm June ita nung IS kiralongrartemi Mosul yimti den anasa aliba yimtsüngtem atsünga agiba mapang nung Khristantem aser Yazidis jenti jenshia liasü.

Kiralongrartemi Mosul yimti agiadokba sülen 2014 küm August ita tashi nungbo Nineveh Plains nung aliba Khristan jilatam aser yimtsüngtem nungi

Khristantem ajak Iraq kübok autonomous Kurdistan region-i jena oadok.

Archbishop Warda-i, tang Khristan kibong 9,000 shibo Nineveh Plains nung parnok meyong kidangi meyipa aruogo, ta metetdaktsü.

Paisa ACN densema telok balalai Iraq nung Khristan yimtsüngtem tanaben yangershitsu atema yariba asoshi pelaba lemsatep.

Ajisüaka paisa, tang linük nung rongsenkettzüing tsütsü timtem tulu aliba ajanga Khristan aikati linük toktsür ogo mesüra toktsür aotsü tebilemba lir, ta metetdaktsü.

Iba dak sendakba nung pai alima linüktem dang Iraq nung timtemba Khristantem mamadoktsüla, ta ayongzük.

Paisa, Iraq nung Khristantemi teyari balala nüngdaker, koba ajanga akhidang Khristantem atema tiyongtsü tesem, Iraq nung Khristan yimsü milak maneni jangrutsü, ta ashi.

AO OSHI ANGAZÜKDAK: TANÜ ANGAZÜKTSÜBA OJANG



Süsü

(adj) temulung mesadem, magütsünü (miser)

\* Tambusang kanga süsü agi tanurtem jashir.

Süsükulem

(adv) kanga junga renemetetba ( well dress, elegant)

\* Sakubabo teti süsükulemer aliba nisung liasü.

OLONG PAITEP # 6814

15x15 crossword grid with numbers 1-16 indicating starting positions.

TIPIEN

- 1. Anenzükdak ki - (5)
3. Asür mangyimba - (5)
5. Temulung nung shisadang - (5)
8. T \_\_\_ lu - (3)
10. Takdang temalen - (9)
11. Tesa \_\_\_ a - (3)
13. Ajungbena temulungjang tongtonglatsü atu - (5)
15. Tejen lai nung tesayur - (5)
16. Tsüngsak-mopung - (5)

LANGTSÜNGLEN

- 1. Reprangdaksü - (4)
2. \_\_\_ ur - (3)
4. Kiojen yangludak - (6)
6. \_\_\_ ait - (7)
7. Nagaland nung ayong ka - (5)
9. Küm kasa purtem - (5)
10. Tetsüng tajemetdak - (6)
12. \_\_\_ adenshi - (4)
14. Tsünüsenbongsü adokdak - (3)

OLONG PAITEP # 6812 TELANGZÜBA

TIPIEN :

- 1. Kasa, 6. Rangben, 7. Mait, 9. Poktet, 11. Ati, 13. Atasa, 16. Rür, 17. Rajang, 20. Lanu, 24. Nüngjem, 25. Süra.

LANGTSÜNGLEN :

- 1. Khu, 2. Süjak, 3. Onük, 4. Oba, 5. Anü, 6. Ratet, 7. Mozü, 8. Ita, 10. Tar, 12. Tinu, 14. Salem, 15. Aja, 18. Anünü, 19. Taju, 21. Ano, 22. Onü, 23. Kua.

NAI-A YA METETTER MA



India nunger 'Hitman' Rohit Sharma-i international cricket nung 600 sixes tekaraba züktetba 'world record' ka yangluogo. Rohit-isa MS Dhoni ajateta India nunger 'most successful captain in T20Is' naroküm nguogo. June 5, 2024 nü India aser Ireland tsüngda ICC T20 World Cup 2024 asayadang Rohit-i international cricket nung 600 sixes tongteta liasü. Rohit sülen Chris Gayle lir aser Gayle-i international cricket nung 553 sixes yangluteta lir. Rohit-isa MS Dhoni ajateta India atema takok teimtiba anguba 'captain' naroküm nguogo.

Jiribam nung telungpurtemi police outpost ka rongdoktsü



Impthal, June 9, 2024

(Agencies): Honibar aonung telungpurtemi Jiribam aser Tamenglong tsüngda police outpost ka nung mi senoktsü.

Jiribam district headquarters nung kilometre 15 shi pilar Leishabithon nung police outpost ka nung mi senoktsü. Honibar aonung 10:00 ako meta telungpurtemi iba mapa inyak aser iba tesem ya Tamenglong district kübok Pankhotphai yimtsüng anasa lir.

Telungpurtemi kasa district nungsa Chotobekra police check post, Jiri Mukh police check post aser Jiri Mukh

Forest beat nung mi senoktsüogo.

Jiribam district nung sorkar kiojentem rongdoktsüba dak alia yimtsüng pezü nung ki 72 rongdoktsüogo, ta ketdangsürtemi ashi.

Iba mepetmesü mapang Jiribam nung Soibam Sarat Singh (65) tepset aser Meitei o Kuki nunger ki rongdoktsü.

Maneni, telungpurtemi police pickets 2 aser Borobekra Forest Beat Office rongdoktsüogo.

Iba tesem nung tensa azüoktsü atema Central aser State Forces mapa lemzüktsüogo.

Jiribam nung tensa mejungi akümba ajanga Superintendent of Police (SP) Jiribam aser Jiribam police station Officer-in-Charge naprong mapa belenogo.

SP Jiribam A Ghanashyam Sharma Manipur Police Training Centre, Imphal East District nung additional director inyaksü belener ta joint secretary (DP)-i Honibarnü ashi.

Külen, MPTC M Pradip-i senior SP Jiribam aser Kabib K-i IGP (intelligence) aser director MPTC inyaksü tetuyuba agütsüogo.

Meghalaya nung taküm load-shedding malitsü: Minister

Guwahati, June 9, 2024

(Agencies): Meghalaya nung taküm load-shedding malitsü ta Power Department-i metetdaksüogo.

Meghalaya nunger aikati power cuts atema ola adoker saka iba ya load-shedding masü saka maintenance work ajanga lir ta

Power Minister AT Mondal-i ashi.

Power nung timtem anguba ya kuli ana lir. Kaji power peria manguba agi aser iba ajanga load-shedding asütsüsa akümer. Tanabubaji maintenance work inyaksü lateta aliba lir aser iba ya tzungluruwa mapang kanga tongtipang lir" ta Mondal-i ashi.

"Tzungluruwa mapang tzunglu, tsüngmok aser yipru ajanga khuretem ajurur. Onoki regular scheduled maintenance inyaksüsa akümer aser ibala mapang power lines nung süngdong laoba aser electricity supply yanglutsüsa akümer" ta Minister Mondal-isa ashi.

Assam high-school headmaster ka itasen magii dang sodi nguogo

Guwahati, June 9, 2024

(Agencies): Assam nung tesayur kati küm 36 tashi itasen magii tesayuba mapa inyaker mapa nungi anisüngzükogo.

Iba nisung ya Tinsukia district kübok Adarsha Vidya Mandir High School founder, headmaster Lal Babu Singh lir.

Pai küm aika inyaka sorkari school magizük aser iba jagi May 31, 2024 nü pa mapa nungi anisüngzüka itasen khen danga mangu süiogo.

Osangbenertemi Ledo nung Lal Babu Singh'er kidangi oa sensaksemdang "Lower Primary section ya provincialized asü saka Middle English (ME) aser High School sections non-provincialized lir" ta pai mepelaba olen ka ashi.

January 2, 1988 nü pa founder headmaster ama inyaksü tenzük aser provincialization asütsü atema inyaka aru.

Education Minister aser Chief Minister Himanta Biswa Sarma dang aiben mepishiaka



Lal Babu Singh

provincialization asütsü ta nangzükba meinyak.

"Assam nung school ka danga non-provincialized malitsü ta sorkari ashi saka iba amaji meinyak" ta Lal Babu Singh-i ashi.

"Iba school ya 1988 nung lapok aser idang nung jagi ni headmaster inyaka aru. Iba school ya government school kümdaktsütsü ta nangzük. Tesüiba election ana nung candidate temi iba school Assam sorkar kübok dendaktsütsü nangzük. Elections tembangba sülen parnoki school semdangi

mesüra jenjang tajungba kümdaktsütsü atema marudang" ta paisa ashi.

Margherita sub-division nung high schools 15 aser LP & ME school 30 tashi provincialized masü lir. Iba ajanga tesayurtem aika timtem ajurur aser parnok kari aansotsü ayoker mesüra nija security guards inyaker. Karbo Bangalore, Delhi aser Mumbai nung mapa inyaksü atema ogo, ta singh-isa metetdaksü.

Assam nung BJP-i aniba sorkari school provincialization atema temulung magütsür ta paisa tai tongloktü.

# Israel-i central Gaza amakdang nisung 226 tepset

**Gaza City, Aami/June 09 (Agencies):** Tang tesüsa Israel mitkari Gaza Strip tesem balala amakdang asüba nisung 274 jungogo aser nisung 700 dak tema yirua lir, ta iba tesem nung aliba Government Media Office ajanga ashir.

Honibarnü anünglen, alilen aser tzüym len nungi amakba ya October ita nungi rarayonga arudang tesashitiba alitsü aser iba mapang central Gaza nung Nuseirat aser Deir el-Balah tesemtem nung kongshi, aser Al-Aqsa Hospital tensa ya "complete bloodbath" ta doctor temi ashir.

Doctor temi iba osang mashidang Gaza health ministry odongtar kati yimtung nung nisung tasü mang aser yirur aika prokshia lir ta shia liasü.

European Union-i Nuseirat amakba ya "massacre" ta sangdong aser doctor kati Al-Aqsa Hospital telung nung shi alepba ki amai lir ta ashir. Iba lendong sülen mozüki tem nung nisung agi masemer ta Doctors Without Borders (MSF) ajanga ashir.

Ano tayimtsü amshia amakdang south tsütsü Rafah yimti anüolen nisung aliba ki aika nung kongshi aser north tsütsü Gaza City nunga tesem aika nung jongshia liasü.

Bomb pokloktsüba ajanga osangtsüsang agitepba nunga kongshi, saka mozüki telung nungi telephone ajanga jembidang, tensa kanga mejungi lir aser aoksakanger nisungtem koloni aotsü memetet yimtung nung lir, ta Al Jazeera indang osangbener Hind Khoudary-i ashir.

"Minute shia bomb apokba lir. Ambulance temi yirur alirtem mozüki bushia bener arur, kong onok temai madokteti lir. Mozüki telung

nung rongrongshirong adoka lir. Yirur alirtem rongnung tila tanurtem dena lir," ta lai ashir.

Doctors Without Borders (MSF) nung paediatric intensive care doctor Dr Tanya Haj-Hassan-i Al-Aqsa Hospital ya "complete bloodbath" lir aser shi alepba tesem ka mesüker, ta ashir.

"Kü dangi noksa aser video tem yokba nung nisungtem azü agi melangbanger tesem ajak nung mejanga aliba nguogo, aser parnok aika tetsüing-tepen pokdoker lir," ta lai osangbener dang ashir.

"Massacre" ta asübaji yamai lir, ta lai ashir. "Tsürabortem tekolak nungi azü yima pei tanur anepalutsü mechi doctor tem bushia parnok senzür. Saka rongrong tulu adoka lir aser anepalutsüpur dang yirur alirtem timba lir."

Israel mitkari sangdong ka nung parnoki Nuseirat nung kiralongrar indang ki o jen nung tenük yoker amaker, ta ashir.

Parnoki mapang tatsüka lir Nuseirat nung operation agidang Hamas teloki pua bener aoba nisung pezü kumzükogo ta ashir. October 7 nü Hamas-i anir Israel south tsütsü amakba sülen nisung 200 dak tema pua bener aortem rongnung par pezü ya dena lir aser parnok temang junga lir, ta mitkari ashir.

Ano central Gaza nungsa Israel sepaitemi Honibarnep Bureij refugee camp nung injang-bomb khaloktsüba mapang Palestine nung kibong ka nungi nisung trok tepset.

Gaza City south tsütsü tayimtsü amshia amakdang residential blocks ajunga samatsü aser anasa gunships ajanga ango apuba rong anendak bomb pokloktsü.

Honibarnü amakba nung

telangzüba agüja Palestine Tir Mahmoud Abbas-i ajungben UN Security Council senden ka amentsü ayongzüka liasü.

Brehostibarnü United Nations-i Nuseirat refugee camp nung lapokba school ka nung Israel mitkari nisung 40 shi tepsetba sülen ano maneni iba tesem amaker.

Iba mapang parnoki kiralongrar nisung 17 tepset ta ashir, saka Palestine refugee atema UNRWA ajanga iba azüdokshi aija sangdong ka agütsüba nung, iba school ya Palestine nung jenokdak kumer liasü aser jelia osang kecha magütsü amak, ta ashir.

Kiralongrar 17 tepset ta Israel mitkari sangdongba ya osang tiazü lir aser parnoki tepsetogo ta sangdonger ya aika takum lir, ta Hamas-i ashir.

Israel-i tesüba ghonda 24 tsüngta Gaza nung nisung 283 tepsetogo aser 814 yirutsüogo, ta Gaza indang Health Ministry ajanga ashir.

Asürtem ya timba Nuseirat nungi lir.

Tang tesüsa tepsetba osang sangdongba ajanga October 7 nü nungi tenzüka Gaza nung nisung 37,084 tepsetogo aser 84,494 yirua lir, ta ashir.

Taruba ita US Congress nung jembitsü atema Israel Ato Kilonser Benjamin Netanyahu-i Washington, DC semdangba mapang US Tir Biden-i pa ajurutsü asü masüar US White House-i mashir.

Iba rara nung Biden ya Israel bhukumer tejangja ka lir, saka Israel raraba yimya nung pa tezü atangba aiben lemsatepa arur.

Tawa TIME Magazine den sensaksemba mapang, yimtenren tsütsü tajangzük angutsü mechi Netanyahu-i asaa rara atsülanger, ta Biden-i shia liasü.

# S Korea-i anti-Pyongyang loudspeaker relays tenzükshitsü

**Seoul, Aami/June 9 (Agencies):** North Korea-i jana bener balloon tem yokba anema arrtsü nung anti-North Korean propaganda loudspeaker broadcasts tenzükshitsü ta South Korea-i metetdaksüogo.

South Korean national security director Chang Ho-jin-i anir jongdak security senden ka amenba sülen ketdangsurtemi arrtsü nung loudspeaker tem amenoka osang agütsü tenzüktsü telemtetba agiogo, ta South tir office sangdong ka ajanga Deobarnü metetdaksü.

Iba jenjang agiba ajanga Nirth Korea meladaksütsü aser iba anema military jenjang balala agitsü akok.

Loudspeakers tem ajanga South Korea-i, Pyongyang anema ken o balala

sangdongtsü, K-pop ken tem temloksütsü aser bendangli osang balala sangdongtsü imlar. Iba amala jenjang agiba ya North Korea-i khenyongi magizüker, kechiyong iba ajanga arrtsü anasa aliba sepaitem aser nüburttem anisa-a Kim Jong Un lenisüba tashi meiti kümdaksütsü ta North-i tsübua bilemer, ta ken o asadangertemi ashir.

2015 küm South Korea-i küm 11 sülen mezüngbuba loudspeaker broadcasts tenzükshiba mapang North Korea-i arrtsü adena artillery khalokja liasü, aser iba sülen South-ia meyiper injang khaloktsütsüsa aküm, ta South Korea nung ketdangsurtemi ashir. Ajisüaka nisung asüba osangbo kecha mali.

Chang aser tanga South Korea nung security

ketdangsurtemi, South Korea nungertem mesüngjemeti kümdaksütsü atema jenjang agiba aitsüogo aser Korean linük ana tsüngda tensa tamajungba kümra aji ajak North tai asütsü ta shiogo.

Hopta ka ana tsüngda North Korea-i jana abenba balloon tem South Korea-i yoka arudar, ta South indang military-i ashir. South nung activists temi North nung propaganda leaflets porkshitsü atema balloon tem yokba sülen anogo ishika dang lir North-i iba jenjang agia liasü.

North Korea-i tang tashi nung jana bener balloon 1,000 dak tema South-i yokogo. South Korea-i loudspeaker broadcasts tenzükshitsü akok ta taoba hopta nungi imla aruogo. Parnoki iba inyakyim ya 2018 küm agina liasü.

# Menungra Bilemteter



Tasüba Anogo: 10-06-1984  
Late. Mrs. Bendangmerenla (Changki)  
W/o Late.Rev.Takosungba (Ungma)

Temeim Oja,  
Küm 40 tejaklen nai iba anogo (10-06-1984) nung sarasadema iba lima toktsür Teyanglur Tsüngrem dangi ao.Na onok den akümüli nung meliaka, ne temeim, menürem jakten, taremsük tanela aser sarasadem tashi onok nükla dangi arua jangra atemer.Ne tanela Kotak nung alitsü teimla nung onok mulung süngzük aser Tsüngrem tenung asanger. Na alishi nung onok nungi talangka pilaa liaka, ne tanela onok den teti lir ta amanga tanü iba anogo onoki sarasadema menungra bilemteter.Teyanglur Tsüngremi ne tanela teti anisüngzükdak yujangma.

Temeim Chirnur, Semchisemnur aser Temeibatem.



Office of the  
**AO RIJU**  
MOKOKCHUNG : NAGALAND - 798601  
"Kenozülu Yinsem"

Date: 08-06-2024

## SANGDONG

Arangtet Tatidang Rongchii 30, 2024 anogo Dissertation Viva Voce agia tembangertem takoker osang:

Reg.No	Division	Reg.No	Division
PGDT/247/21	1st	PGDT/220/20	2nd
PGDT/163/18	1st	PGDT/243/21	1st
PGDT/239/21	1st	PGDT/240/21	2nd
PGDT/225/20	1st		

\* Aami 10, 2024 anogo nungi Marksheet office nung angutsü. Marksheet agizüki arudang Admit card Photostat copy ka bener arutsü metetdaksür.

Sd/-  
Prof. Rev. Rongsen Longkumer  
Chairman

Sd/-  
(S. Wati Ozukum)  
Secretary

# Yemen kübok Aden anasa rong ana missile agi amak

**London, Aami/June 9 (Agencies):** Yemen kübok Aden tesem anasa missile-i akhaba sülen rong ana nung mi adoka liasü ta, UK maritime agencies anati Deobarnü metetdaksü.

British security firm Ambrey-i Deobarnü ashiba agi, Antigua aser Barbuda wako songer aliba general cargo rong ana Aden nungi southeast len nautical miles 83 pilar jajaya aliba mapang missile agi kongshia aser mi adoka liasü. Iba lendong atalokba sülen mapang tatsüka lir mi ya remsepogo, ta kasa sangdong ajanga metetdaksü.

United Kingdom Maritime Trade Operations (UKMTO)-ia, Aden nungi southeast len nautical miles 80 pilar jajaya aliba rong ka indang captain kati osang agütsüogo, ta ashir.

"Rong ya Gulf of Aden nung southwest leni speed 8.2 knots nung oya aliba mapang missile ka agi forward station dak kongshia liasü. Iba sülen mi adok saka remsepogo," ta Ambrey-i metetdaksü.

"Missile tanabuba khaloktsüba nguogo, saka rong dak mekongshi. Iba lendong atalokba mapang rong temeket nung rong tilila nung mener alirtemi rongdak injang khalokja liasü," ta Ambrey-isa metetdaksü.

Ambrey-i, lendong atalokba sülen rong lenmang melenshi

as er rong tali takaraba anir ao, ta ashiba den lendong nung nisung yiruba osang kecha mali, ta shisem.

Kasa mapang nung Ambrey aser UKMTO nati, Aden nungi southwest len nautical miles 70 nung tanga lendong ka atalokba osang angazükogo, ta metetdaksü.

"Rongniri rong indang aft section nung mejangjaba missile kati kongshi aser mi adoka liasü, ta metetdaksüogo," ta UKMTO-i ashir.

UKMTO-isa, lendong nung nisung asüba osang kecha mali aser rong ya taruba rongnendak bushia odar, ta metetdaksü.

Yemen nung Iran den sendaktepa aliba Houthi teloki joko ita aika Temerem tzüym aser Gulf of Aden nung rongtem maka arudar. Gaza nung rara anendaksütsü khanga parnoki iba jenjang agia arudar.

Houthi teloki November ita nungi Bab al-Mandab Strait aser Gulf of Aden nung drone aser missile amshia rongtem maka arudar aser iba ajanga rongtem Africa meketa lenmang talangba agitsüsa kümogo.

Rongtem amakba anema United States aser Britain nati meyiper Houthi pur tamendakdak balala maka arudar.

### Pre-Subroto asayamung: U-14 Boys semi-finals tanü asayatsü



**Kohima, Aami/Jun 9 (TYO):** Mezüngbuba Under-14 Boys State Level Pre-Subroto cum Junior Football Tournament 2024 nung Hombarü Peren, Wokha, Chumoukedima aser Kiphire district tem asayatsü. Mezüngbuba semi-final Peren aser Wokha na 10 ako nungi tenzüka asayatsü aser tanabuba semifinal Chumoukedima o Kiphire ya 12:30 ako nungi tenzüka asayatsü. Kasa mapang nung Under-17 tetsür asayamung-a

Honibarnü nungi tenzüka distict teku asayadar. Iba asayamung nung Pool A nung Phek, Wokha aser Kohima, Pool B nung Peren & Chumoukedima, pool C nung Noklak & Dimapur aser Pool D nung Zunhehoto & Mokochung lir. Iba asayamung ya Department of Youth Resources and Sports-i ayongzüka Indira Gandhi Stadium nung asayadaki aser June 11 nü tembangtsü. **U-17 tetsür mezüngbuba asaya anogo osang:**

1. Phek beat Kohima 7-0
  2. Chumoukedima beat Peren 8-0
  3. Noklak beat Dimapur 2-0
  4. Zunhehoto draw Mokochung 0-0
  5. Kohima beat Wokha 5-0
- June 10 nü asaya osang:
1. Phek vs Wokha @7am
  2. Noklak vs Dimapur @8:30am
  3. Chumoukedima vs Peren @ 12:30am
  4. Mokochung vs Zunhehoto @2pm.

### Nigeria nunger striker Chukwu Chennaiyin FC nung denogo

**Aami/June 8, 2024** (Agencies): 2024-25 season atema attacking akangshitsü asoshi Chennaiyin FC-i Nigeria nunger forward Daniel Chima Chukwu anisemogo. Arishi küm 33 tain Chukwu ya asayar tejen ka lir aser pa Indian Super League (ISL) nung East Bengal aser Jamshedpur nungia asayaogo. Pai Chennaiyin den küm ana atema tenanzüktepa yangluogo aser pa 2026 küm asayar pezübuba alizükogo. Coach Owen Coyle kübok asayaba mapang 2022 küm Chukwu-i Jamshedpur atema tongtibang shilem agiogo aser iba küm parnoki ISL League Shield koka liasü. ISL nung season asem asayaba mapang pai asaya 60 nung shilem agiogo aser iba mapang goal 20 idaktsü aser assist pezü süja liasü. Pa Chennaiyin FC nung adenba ajanga team attacking tashi taitba kümdaktsütsü imlar, kechiyong pa ya asayar tejen ka aser lenir tajung ka lir. Coach Coyle, shiba taoba mapang Jamshedpur nung

Chukwu den külemi inyakogo, pai Chukwu anisemba ajanga team nem teyari tulu agütsütsü imlaba lemsatepogo. "Ni 21/22 season winter window nung Daniel Jamshedpur-i anri aru aser pai tongtibang goal 9 idakja onoki shield akokba nung teyari tulu agütsü. Onoki goal idaktsür ka anisemogo aser pa team asoshi tapet asütsü ta temulung lema bilemer," ta Coyle-i ashi. Chukwu indang professional career ya 2010 küm Norway nung Molde FK nungi tenzü. Molde FK nungi asayaba mapang pai league aser tetoktepa balala nung goal 114 idaktsü aser Molde FK-i league titles asem abenba den Norwegian Cup ana akokba nung teyari agüja liasü. League asem rongnung anabo Ole Gunnar Solskjaer lenisüba nung asayaba mapang bona liasü. Maneni pa Polish club Legia Warszawa nungia asayaogo aser iba mapang pai league title ana bona liasü. Pa China nunga Shanghai Shenxin, Heilongjiang Lava Spring, aser Taizhou Yuanda nungi asayaogo.

### UFC bout nung Puja-i otsü tasen ka yanglu



**Aami/June 9, 2024** (Agencies): India tsür Puja Tomar-i otsü tasen ka yanglua linük nungi Ultimate Fighting Championship (UFC) nung bout ka akokba mezüngbuba asayar kümogo. Tomar shiba tang mezüngbuba UFC nung asaya liasü, lai Honibarnü straw-weight (52kg) category nung Brazil tsür Rayanne dos Santos 30-27, 27-30, 29-28 agi koka liasü. "Iba ya kü kija takok masü. Iba takok ya India nunger fan tem aser India nunger fighter tem ajak takok lir. Taoba mapangbo ajaki India nunger fighter tem züngshia maliasü. India nunger fighter tem tamakokertem masü ta sayutsü atema iba asaya akoktsü dang bilema liasü," ta Tomar-i ashi. Arishi küm 30 tain shiba dang "cyclone" ta ajar, lai taoba küm October ita UFC den tenanzüktepa ka yanglua Mixed Martial Arts promotion tulutiba nung tokteptsü atema India tsürtem rongnungi

mezüngbuba asayar aküm. Anshul Jubli aser Bharat Kandare nati UFC nung India tenüng nungi asayaogo aser Canada nung amendaker aliba India nunger Arjan Singh Bhullar-ia asayaogo. Tomar ya Uttar Pradesh nung Muzaffarnagar kübok Budhana yimtsüng nung aso aser la ya ponguben tashi national wushu champion lir aser iba den la karate aser taekwondo dena asayar. Maneni la Matrix Fight Night densema tanga asayamungtem nung shilem agiogo. Matrix Fight Night nung lai straw-weight title anaben tashi bona lir. MMA ya full-contact combat sport ka lir, koba alima ajunga nungi combat sports balala nungi technique tem bendena asayaba asaya ka lir, aser iba ya striking, grappling aser ground fighting dak amendaker lir. Ultimate Fighting Championship ya American mixed martial arts promotion company ka lir.

### Sanjivani Jadhav-i Portland nung 10,000m asemtepba kokogo

**Aami/June 9, 2024** (Agencies): Asian Championships nung bronze medal ngur aliba asemteper Sanjivani Jadhav-i, Portland Track Festival High-Performance Meet nung tetsür 10,000m asemtepba kokogo. Lai alizüng 32:22.77 seconds nung tongteta liasü. Arishi küm 27 taina asayar atema Portland ya tongtibang asayamung ka kümogo, kong lai taoba küma alizüng 32:46.88 seconds nung tongteta tanabuba jenjang nung tembanga liasü. Kasa asaya nung India tsürsa Seema-i alizüng 32:55.91 nung tongteta la pongububa nung tembanga liasü. Commonwealth aser Asian Games medallist, Avinash Sable-i, tebur 3000m steeplechase asaya nung alizüng 8:21.85 seconds nung tongteta tanabuba jenjang nung tembanga liasü. Pai 2022 CWG nung alizüng 8:11.20 nung tongteta national record ka yanglur aliba dang nungi tang iba asayamung nung second 10 agi tekaraba asemtet, saka tanabuba jenjang nung dang tembanga liasü. America nunger asayar Kenneth Rooks, shibai 2023 USA Outdoor Track and Field Championships nung 3000m steeplechase national title bona



lir, pai alizüng 8:18.77 nung tongteta la tasembuba jenjang tongteta pa temaba jenjang nung liasü. Iba asaya nung ano India tsür Priti-i alizüng 10:12.88 seconds nung tongteta la 20buba nung tembang. India nunger elite middle aser long-distance athletes tem aika Colorado nung tang training agidar aser parnok Portland Track Festival nung toktepdaki.

**BILEMDANGANG**  
**"Anema alibaji rongsen ajak dang nungi taoba."**